

Museo Ladin de Fascia

SE AUR L ISTÀ CON SACOTANTA NEVES

La premiazion de “Mia Majon di fascegn”, na neva aplicazion per veder I Museo e n muie de ativitèdes che viventarà l’Istà te Museo

En vender ai 10 de jugn, da les 5 domarena, vegnarà avert ofizialmenter l’istà del Museo Ladin de Fascia, con n event che portarà dant la **neves de chesta sajon 2022**.

“Conties depentes/Leggende dipinte” - laboratorie de decorazion sun ceramica con argoment la conties (endrezà en colaborazion con ELEL Ceramic Art) - I se jontarà ite a la atività per families “Giramuseo” e a la vijites vidèdes. Per la 5 Sezions sul teritorie, apede a la vijites vidèdes, jirà inant “A spas che spas”, raida per bec e families col didament de na mapa originèla da empieir ite coi stempei de la sezions per avenjer n belot don a la fin. De gra a la colaborazion coi Comitac de la manifestazions amò apede, fora per de messèl e aost, la sezions vegnarà avertes vèlch outa ence te etres oraries, per portèr dant ativitèdes desvalives e foradeanter. L Museo Ladin sarà protagonist del **Circen Dolomites Festival**, I Festival de circo de la Dolomites fascènes, apontin con **inaudazion te Museo ai 29 de messèl**, e la proponeta de scomenzadives da marevea con argoment l’Enrosadira: I spetacol naturèl che entenc de checen I crep dolomitich canche nasc e fior soreie.

L percors de digitalisazion e valorisazion de la scomenzadives de Museo imersif peà via co la neva direzion l’ha portà desche resultat I endrez de la **App MOBicult**, gran neva del istà 2022. Se trata de n didament sorì per se vardèr enstesc la sales de Museo, da descìarièr debant sun tablet o fonin. Chest strument compagnarà i utenc te dut I percors museèl tres na descrizion a tapes de la sales, da scutèr direto dal dispositiv personèl, con aprofondiments dediché a argoments o toc particulères. La aplicazion la é stata metuda adum da la firma trentina Suggesto en colaborazion co l’Univeristà de Trent e la Fondazion Bruno Kessler, delaita da na cordanza anter I Museo de la Vera de Rorei e I Palaz de la Magnifica Comunità de Fiem, a chela che do se à jonà ite ence I Museo Ladin de Fascia, de gra al didament finanzièl de la Region Autonoma Trentin-Sudtiroi. La App sarà a la leta per ladin fascian, talian, todesch e ingleis.

«Sion spervajes che chest posse esser n strument percacent per la vijita al Museo, che I darà I met de entener miec i contegnui sporc, col dezider enstesc i setores che se vel cognoscer inout e I temp che se vel se tor fora per la vijita», disc la operadores del Museo. «Ence per la scoles e i dozenc, o per duc chi che volarà se endrezèr dantfora la vijita, o veder endodanef la sales te n auter moment, la App sarà n strument n muie utol. I contegnui del projet i é stac endrezé metan adum l’esperienza fata dai Servijes Educatives de Museo per utenc desvalives coi aprofondiments etnografics, storicis e artisticis resultat de la sacotanta enrescides portèdes inant da la Majon di Fascegn ti egn».

Na pèrt entria de la App la é dedichèda a la sezions sul teritorie e tel davegnir se podarà jontèr ite neves percorsc con contegnui desvalives o mostres temporanes.

Amò apede, te chesta ocasion vegnarà metù fora te Sala “L. Heilmann” i lurieres da marevea e originèi rué ite per la scomenzadiva “Mia Majon di Fascegn”, leèda a la prejentazion del nef logo: la endesfida la é stata tutta su da persones soules e da realtèdes sozièles sul teritorie per interpretèr e reprodujer a na vida creativa la neva parbuda de la Majon di Fascegn.

«Envion duta Fascia e i **operatores turisticis** a tor pèrt de n muie a l’inaudazion de la sajon da d’istà del Museo Ladin, per cognoscer la ativitèdes e esser vertesc a ge sporjer ai sacotenc ghesc che à cernù Fascia desche zil per sia vacanzas na alternativa enteressanta, moderna e curiosa per descoriger la storia, l’identità e la cultura ladina» Sabrina Rasom, diretora de la Majon di Fascegn.

(DB/SR)